



Cijeli Kanton Sarajevo ugrožen zbog "samovolje Senada Arnautovića": Radnici "Veterinarske stanice" i dalje u štrajku

0

Radnici Kantonalnog javnog preduzeća "Veterinarska stanica" d.d. Sarajevo od 27. oktobra su u štrajku, a do sada nisu uspjeli riješiti niti jedan od problema koji, kako navode, uništava to preduzeće.

Radnici navode da sada nisu samo oni ugroženi, nego cijeli Kanton Sarajevo, s obzirom na to da su se pojavili novi slučajevi bruceloze.

Predsjednik Štrajkačkog odbora tog preduzeća Dženan Rizvo za Agenciju *Fena* kaže da je sada situacija najozbiljnija, te da su još uvijek prisutni isti problemi koji usporavaju i blokiraju rad preduzeća.

Radnici su tražili smjenu vršioca dužnosti direktora Senada Arnautovića i da im se isplate neisplaćene plaće i uplate doprinosi.

Ministarstvo privrede Kantona Sarajevo donijelo je Rješenje o smjeni Arnautovića, međutim, iz preduzeća navode da se desilo ono čega su se bojali, a to je da će Arnautović opstruirati primopredaju dužnosti i nastaviti ometati normalno funkcioniranje preduzeća.

Na funkciju v.d. direktora imenovan je Igor Jerković, ali nije upisan u sudski registar i nema pečat. Predmet je na sudu, a Rizvo kaže da se nada da će ubrzo biti riješen, te da će Jerković moći obnašati funkciju na koju je imenovan. To bi, smatra, stabiliziralo preduzeće i počeli bi se rješavati problemi.

Savez samostalnih sindikata BiH u saopćenju je upozorio na opasnosti i brojne probleme koji su posljedica štrajka preduzeća "Veterinarska stanica" d.d. Sarajevo.

Naglasili su da se svakodnevno nagomilavaju problemi u preduzeću, da su radnici na rubu egzistencije, da je neisplaćeno šest plaća, sedam toplih obroka, te da im je neuvezan radni staž.

– Preduzeće i dalje svjesno uništava, zbog ličnih interesa, Senad Arnautović – istaknuli su.

Podsjetili su i da preduzeće svakodnevno kažnjavaju inspekcijски organi zbog nerada, a sve zbog samovolje Arnautovića koji, kako navode, sebi uzima za pravo "da pati 50 radnika i uništava imovinu Kantona".

| Fena

SHARE.

